

እብራዊኒ ሜያክ ዋስቴ ዋሲያ ጋቻግሩ

ሀን ዋሲያሰ ትቼናሰ አማኝኒ ሜያሰታ አካማ ቱጋኦ ካርና ቦርእ አማንቶቤሲሶን ቤዮኖይቴማቶ ቱትኒትሶን አሩቲ ኡክናዋ ችኦክዋ፤ ሀን ትቻሶን ትች ባር እብራዊኒ ሜኒ አማኝኒ ሜያክ የሱሰ ክርሰቶሰ ፋቶ ደይ ሀኦሶን አምማኖን ኬሰሬ ቤሰር ሰኒባሶን ቤሱናክ። ኤሰ አማኝኒ ሜያ አማንቶቤሲሶክ ዛጉሶነክ ባሶትን ችኒድፌር። ኤሰ ባርን ደይ ዛግፊና ካባሲክ ኬዝ ፋቶ አምማኖን ክሰሬ ቤሲ፡-

1. ኤጴቴና ሻናሲኪ ካሞ አባሲክ ፋቶክ እጃጃምቴር ሰና የሱሰ ኮእባ ፎንቶ ሀኦኒ ናዋ። ሀኦኒ ና ሰንባሲክ ኩርኡ ቴያኒ ካማሲ ራጂኒ ሜያ፤ ሙሴኒሰታንናዋ ሀኦሲ ዋሰያሲክቶታንና ባር አካማኖን ደናሎዋ።
2. የሱሰ ኩርኡ ቴያኒ ካማሲ ማግኒ ሜያሰታን አካማኖን ደናሎ ሰና ኮእባ ፎንቶ ማግ ሰንባሶን ሀኦሰ ቴትባሲክ ማኬዋ።
3. የሱሰኒኪ ካሞ አማኝኒ ሜያ ቦርእሰን፤ ድጋሰንናዋ ክቱሰንና ፋእቶሶን። የሱሰ ማግኒ ሜኒ ማግ ሰንባሲክ እብራዊኒ ሜኒ አማንቶሲክናዋ ሰትሪሲክና ካባሬ የሬ ዋግኒ ማኦሰ ይራራኒማቶ ሰንና ቢሰቴት ፋ ፋሩሰ ፋቶ ሰናናክ ዛግ።

ሀን ትቻሶን ትች ባር እሰራኤልኒ ሜኒ ቶቾሲክ እርቶ ሰንና አሱኒ ሜኒ አማንቶሶን ቤሶ ዛግሬ ኬእክ (ኤድዴ 11) ፌሬትሴፌ አሱኒ ሜያ አማንቶቤሲሶክ ዛጉሶነክ ያዳሰድፌር። ኤሲሰማቶ ኤድድ 12 ፌሬትሴፌ አሱኒ ሜያ ኦፍቤሲሶን የሱሰኒሰታ ዛጉክ አማንቶቤሲሶክ ዛጉሶነክናዋ ኦፋ ሻነዋ ራኮነ ባሶሰታ ካርፋና ካባሲክ ፋኩሶነክቱ ኪትፌ። ኮእባሰታክ ደይ ኪቶነዋ ቱትኒትሶን ኦድት ይፋ ካምነ ማኮክ ዋሲባሶን ኮርእ።

ማፃፋሲ ሰሩክ ኤጽና ኤጸባሰ

ጋቻግሩ ሀኦሰ ክርሰቶሰኒኪ ካሞ አምማኖን ቤሰቶባሰ 1:1-3 ክርሰቶሰ ሀኦሲ ዋሰያንክቶታኒ ደናሎ ሰንናማቶ 1:4—2:18 ክርሰቶሰ ሙሴኒሰታንናዋ እያሱኒሰታንና ደናሎ ሰንናማቶ 3:1—4:13

ክርሰቶሰ ማግሳታን ደናሎ ሰኒባሰ 4:14—7:28

ክርሰቶሰኒ ቴያኒ ካማሰ ደናሎ ሰንናማቶ 8:1—9:22

ክርስቶስን ማእ ሰናሰ ኦርክራ ቤሰቲ፤ 9:23—10:39
 አማንቶሲ አካማ ሰና 11:1—12:29
 ሀኦሶን ግርሱ 13:1-19
 ኮኢኒ ሺጾ 13:20-21
 ኮርኡባ 13:22-25

ሀኦሰ ናወባሰኪ ካሞ ማኬ

1 ሀኦሰ ዜሞቲ ነያሲ ሾዎ ኡግናክ፤ ራጂኒ ሜያኪ ካሞ እንኖ አባኒ ሜያክ ሾዎ ካባ ማኬት ፋር።

2 ሰኩንታኖ ሀሽ ኦርፎቲ ነያሲ ዙታምባሴ አሲን ዋራሶኒር ዛግና ናወባሲኪ ካሞ እኖክ ማኬ። ሀን ዳሶን ደይ ዙታምባሴ አሲን ቲሲናሰ ባሪክዎ።

3 ባር ሀኦሲ ኡልፍናኖን ፓልፓልግሬ ቤሲር። ባር ሃላባሲክ ሀኦሰኔን እነ ማእሰሬ እሳርዋ። ካምባሲ ሁግናክ ሀን ዳሶን ዙትሬ ቲቤ ኤጲዋ፤ አሱኒ ሜያኖን ደይ ቦርቤሲሰን ካይምሰንናኔን ኦርፎ ሳማኪ ሁግናባ ፋና ሀኦሲ ሆእታ ዲ።

4 ባሪክ እምቲ ሱናሰ ሀኦሲ ዋሰያኒ ሱንታን ደናሎ ሰንናማቶ ሀኦሲ ና ሀኦሲ ዋሲያታን አካማኖን ደናሎዋ።

ሀኦሲ ና ሀኦሲ ዋሲያታን አካማኖን ደናሎ

5 ሀኦሲ ባሪ ዋሲያሲ ጋነያሰን፡-

«ነ ናታዋ፤

ሀውቶ ኔን ኮኒን»

ሄፕሳ ደይ፡- «ታ ባሪክ አባ ሰናና፤

ባር ደይ ታክ ናታ ሰናና»

ይናሰ ኦንኒንሶ?

6 ሀኦሰ ኡዛ ናወባሰን፤

ሀን ዳሰታክ ዋሲፋና ካባሲክ፤

«ሀኦሲ ዋሲያ ዙቲራ፤

ባሪክ ሳጋዶና» ይፋዋ።

7 ሰኩንታኖ ሀኦሲ ዋሰያኒ ችዋሲክ፤

ደይ፡- «ሀኦሰ ዋሲያኒክቶኖን አያናኒክቶ፤

ሀኦሲክ ዋሰቲሴፌ ባሶትን፤

ደይ ጌኒ ውኖኒክቶ ዛጉኒር» ይፋዋ።

8 ሰኩንታኖ ናሳ ችዋክ፤

«ሀኦሴ፤ ዝግሞኔሰ ኮእባ ፎንቶኖን ፎኒር፤

ታቶኔሰ ደይ ኦኮኒ ሃር።

9 ኦኮሶን ሹኒት፤ ማንጉሶን ደይ ኦምቲት፤

- ኤስ ባሪ ቦርኣ ዳማ ሀኔኔስ፤
ዘሞኔሳታን ደናሎኖን ግራ፤
ሙዳክ ኔን ሙድ» ይፋ።
- 10 ኤሲስማቶ ደይ፡-
«ዳሚሶ! ነ ዜምማ ዳሶን ቴሲትዋ፤
ሳማሲክቶ ደይ ኩሹኔሲ ዋስቶዋ።
- 11 ኤስ ባርኪቶ ዙቴራ ትሹኒር፤
ሰኑንታኖ ነ ፎታር፤
ዙታምባሴ ማምኒማቶ ኩርኤና።
- 12 ማምኒማቶ ደይ ዛግራ ብሩታ፤
ባርኪቶ ደይ ማምኒማቶ ሰንና ሶልቶና፤
ሰኑንታኖ ነ ኣኔ ኣኔ ሰንፋናክ፤
ነ ኔሲክ ኮእባ ኣፋ» ይፋ።
- 13 ሀኦስ ባሪ ዋሰያሲክቶኒ ጋነያሰን፡-
«ጉማኔሳክቶኒን ዋቹኔሲ፤
ሰካሎሲ ዛጉና ካባኔን፤
ታ ሆእታ ቴሻሰታ ዱዋ»
ይናስ ኦንኒንሶ?
- 14 ኤካን ሀኦሲ ዋሲያ ዙቴራ ፋሩኒ አሱኒ ሜያክ ዋስቶናክ
ዋስቴራ ያ ሀኔኒ ዋስትኛ ሰና አያናኒክቶታኖሶ?

2

ዳንኒ ፋሩሶን ማእሰራ ኦዳኒክቱ ሾልሰፋ

- 1 ኤስ ባሪ ቦርኣ ኦዳኒ ሻዋሰታን ሞርኦሬራ ጋንዶናይኒማቶ
ኦዳኒ ወዛሲ ሻዋኖን ማእሰራ ኦዳኒክ ሾልሱዋ።
- 2 ሀኦሲ ዋሰያኪ ካሞ ማክቴ ካማሰ ፋቶ ሰኒዋ። ኤስ ካማሶን
ኣትፌ ባርናዋ ሀን ካማሲክ አጃጃምቶኖይ ባርና ሾልሱ ኬኦሶን
ኤጴቶና።
- 3 ኤኪን እንኖ ሀን አካማ ፋሩሶን አርፋት ቤይፋንነ ኣካክ ኣታ
ኬሳክ ችማኒሪንሶ? ሀን ፋሩሶን ዜምሜ ማኬስ ዳሚስዋ።
ባርኪን ኦዳ አሱኒ ሜያ ሀን ባሮንኑ ጋሳሲሴሬ ማክሴቴዋ።
- 4 ሀኦስ ደይ ማላቶሲክቶኖን፤ ዲንቂ ሻዋሲክቶኖን፤ ሾዋ ቴሳ
ቢስቴራ አርቶኖይ ወዛሲክቶኖን ዛጉክናዋ ባር ፍቃዲሲማቶ
እምቴ ኮርቶ አያናሶን እማክ ባሶ ዛላስ ፋቶ ሰኒባሶን ቤሲዋ።
- አሱኒ ዛላ ዙታምባሴ አሲክ ፋሩኒ ዞንሲ ሰናስ የሱስዋ
- 5 ሀኦሲ ሀኔንቲ ዮኒ ባሮን ሀን ዋል ሌት ፋኒ ዳሶን ሀኦሲ
ዋሲያ ሀኦሱናክ ኣነ ዛጉዋ።

- 6 ኤሲሰማቶ እሳ ድምታ ኤካ ይሰቴ፡-
 «ነ ባሪክ ሳፋሮታክ አሱ ኣምቤንሶ?
 ባሪን ደይ ኦዳታክ አሱኒ ና ኣምቤንሶ?
 7 ጋሮ ዋኒሮን ሀኦሲ ዋሲያታን ሀቴሰት፤
 ኡልፍንነዋ ጋላትነ አሲ ዛዉድ ጉፍሰት፤
 8 ዙታምባሴ አሲን፤

ባሳ ሀእሱሲ ሰካሎሰ ዛግት።»
 ዙታምባሴ አሲን ባሳ ሀእሱሲ ሰካሎሲ ዛግፋና ካባሲክ ባሳ ሀእሱሲ ሰካሎሲ ዛጉኖይ ፋኤናር እሳ ዉዘነ ኣፋዋ። ሰኑንታኖ ሀሽቲ ፋ ባር ዙታምባሴ ባሳ ሀእሱሲ ሰካሎሲ ሰንናማቶ ሀሽኑ ኣነ ብየኒዋ።

9 ሰኑንታኖ ሀሽ ሀኦሲ ዋሲያታን ጋሮ ዋኒሮን ሀቴሬ ፌ ባሪን ክቱኒ ሻናሶን ኤጼቴና ቦርኣ ኡልፍንነዋ ጋላትኒ ዛዉድነ አሲን ጉፌ የሱሰኒን ብያኒ። ባር ሀኦሲ ኦትማክ እንኖ ዙታምኒሴ አሲክ ኪትዋ።

10 ዉዛ ዙታምባሴ ባሪክናዋ ባሳርና ሰንና ቴሰቴናሰ ሀኦሲ ሾዋ ናንጎታ ሀሻ ኡልፍናሲክ ኤጳ ዮናክ ባሶ ፋሩሰ ዞንሲ ሰና የሱሰ ሻናሲክ ማእሰሬ ዛግ ሰንነ የሮናክ ሾልሲዋ።

11 አሱኒ ሜያኖን ኮርቶ ዛግፋ ባሬዋ ባሪክ ኮርቶ ሰና አሱኒ ሜያ ደይ እሳ አባኒ ናንጎትዋ። ኤሰ ባሪ ቦርኣ የሱሰ ባሶትን፡-
 «አይታሳክቶኖ!» ይሬ ቴጎናክ ኣነ ኢቼፌ።

12 ኤሲሲክ ኮርቶ ማፃፋሰሲ፡-
 «ሱኔሶን አይታሳክቶኒክ ማኮናዋ፤

ማባራሲ ጋነሲ ቴቾክ ጋላቶናዋ» ይፋዋ።

13 ኤሲሰማቶ ደይ፡- «አማንቶናሶን ባሳሰታ ሀእኡናዋ» ይፋ።
 ሄፕሳ ደይ፡- «ኤሴ ታናዋ ሀኦሰ ታክ እምና ናንጎትናሴ ሀንታ ፋኒዋ» ይፋዋ።

14 ኤሰ ባሪ ቦርኣ ሀን ናንጎታሲክቶ ሀሪንባሬዋ አሽባሬ ፋና አሱ ሲነቴ ቦርኣቱ የሱሰ ደይ ባሶሲማቶ አሱ ሰኒ። ኤሰ ባሪን ዛግናሰ ክቱባሰኪ ካሞ ክቱሰታ ሀእሱኒ ሁግናባ ፋና ዳሎሎሰኒን ትሽኩናክዋ።

15 ኤሲሰማቶኑ ኪቱሶን ድግሴቴ ቦርኣ ኔቤሲሶን ዙትሬ ቦዞሲ ሰካሎሲ ፌሴ ባሶትን ብርማዲምማ ክሱናክዋ።

16 የሱሰ አርጋሱናክ ሾሌናሰ ሀኦሲ ዋሲያኖን ሰንኖይናሮን አብራሀምኒ ዛላሶን ሰንባሰ እምማዋ።

17 ኤሰ ባሪ ቦርኣቱ ዉዛ ዙታምባሴ አሲክ አይባሳክቶኒማቶ ሰናናክ ሾልሲ። ኤሰ ባሪክ አሱኒ ሜኒ ቦርኣሶን ትሽኩኒ ማኦ

እምሜ ሀኪሲክ ዋሰቶክ እማናምቶናዋ ፋኪ ማግኒ ጋኝኜ ሜኒ ጋኛና ሰኒዋ።

18 ባር ቴትባሲክ ፋታንቴሬ ሻናሶን ኤጴቴና ቦርኣ ፋታንቴሴፌ ባሶትን አርጋሱናክ ችማናዋ።

3

የሱሰ ሙሴኒሰታን ደናሎ ሰንናማቶ

1 ኤሰ ባሪ ቦርኣ ሳማኪ ቴግቶሶን ሃኦኒር ሰና ኮርቶ አይታሳክቶኖ! እማንቶኒሲ ዋሲ ሰና ባሪንናዋ ማግኒ ጋኝኜ ሜኒ ጋኛ ሰና የሱሰኒንና ሳፋሮትዋ።

2 ሙሴ ሀኦሲ ኬያ ዙታምባሴ አሲሰታ እማናምቶ ሰንናማቶ የሱሰ ደይ ባሪን ታትሲ ሀኦሲክ እማናምቶዋ።

3 ኬያሶን ኬርኣፌ ባር ኬያሰታን ደናሎኖን ኡልፍንባ ፋናማቶ የሱሰኒክ ደይ ሙሴኒሰታን ደናሎኖን ኡልፍና ሾልሲርዋ።

4 ፋቶሲክ ኬያ እሳርባ እሳርባሲክ ባሮን ኬርኣ አሱባ ፌርዋ። ሰኩንታኖ ዙታምባሴ አሲን ኬርኣሰ ሀኦሰዋ።

5 ሀኒንቲ ማክቶኒ ዉዛሲክ ዛላ ሰናናክ ሙሴ ሀኦሲ ኬያ ዙታምባሴ አሲሰታ ዋሰትኛኒማቶ እማናምቶ ሰንና ፌር።

6 ሰኩንታኖ ክርሰቶሰ ሀኦሲ ኬሩክ እማናምቶ ሰንናሰ ናኒማቶ ሰንነዋ። ኤሰ ኬያሰ ደይ እኖዋ። ባሪ ኬያ ሰናኒሰ እማኒፌኒ ዉዛሴዋ ቴቴፌኒ አብዲሴ አሲን ማእሰራ ኤጽፋኒዋ።

ሀኦኒ አሱኒክ እምቲ ኬኦኒ ኪቶ

7 ኤሰ ባሪ ቦርኣ ኮርቶ አያናሰ ማኬፋናሲማቶ፡-
«ሀሽ ሀውቶ ካምባሶን ኦደፌት ካባሲክ፤

8 ዛቦሲክ ፋታንቴፌቲ ካባሲክ፤
ማኞክ ታይሰታ ካብሴቴይሲማቶ፤

ንብኒትሶን ኤጴቶ ቤያር ዛጉትታ።

9 ኤሰ ካባሲክ ዜምቲ አባንቲሳክቶ ታን ፋታነሴቴ፤
ደይ ታን ቴኦኒሴቴ፤

አቺቻሰር ዋግጋ ዛግና ባሮን ደይ ብየቲ»
ይፋዋ ሀኦሰ።

10 «ኤሰ ባሪ ቦርኣ ኤሰ ኮኒቶሰታ ሃሬን፡-
ኀብቤሲሰ ዋንና ዋንና ዳጌቱ ፋፋ፤
ኡጉናሶን ደይ ኣነ አርሶቶ ይቻዋ።»

11 ደይ፡-

« ነታ ባሶክ እማናክ ፋ ቤይሳኒ ድማሰታ፤
እሳንነ አፋ ግርሶነ ዉዛ! » ይራ፤

ግእናሲክ ቲይቻዋ» ይ።

¹² እይታሳክቶኖ! ንቶ ጋነያሰን ኦኑ ሀየዋ ሀኦሰታን ዋክሱኒ ማቹነዋ አማኖኖይ ንብነ ፎኖይናማቶ ቲትኒትሶን ኦድትዋ።

¹³ ኤሰ ባሪሰታን ደናሎ ንቶሰን ቦርኣሲክ ኤሽቴሬ ንባሶን ኤጰ ቶ ቤያር ዛጉኖይናማቶ፡- «ሀሽ ሀውቶ» ይሰቴራ ቲግቴ ዋናሰ ፋና ካባሲክ ዋንና ዋንና ሜርኮትዋ።

¹⁴ ቴሱሰታኪ ፋ አማንቶኒሶን ሀማ ኮእባሰታ ካርእና ካባኔን ዛግራ ኤጵፋንነ ክርሰቶሰኔን እነ ዋራሴርቱ ሲናኒዋ።

¹⁵ ኤሲሰ ደይ፡-

«ሀሽ ሀውቶ ካምባሶን ኦደፊቲ ካባሲክ፤

ኤሰ ኑሪፊት ካባሲክ ዛግሴትሰነ ፋርን፤

ንብንትሶን ኤጰ ቶ ቤያር ዛጉትታዋ»

ይሰቴራ ማክቴናሲማቶዋ።

¹⁶ ኤካ ኤሰ ባሶ ካምባሶን ኦደሴቴኔን ኦርፎ ኑሪሰ ኦና ኦናንሶ? ኤሰ ባሶ ሙሴ ዞንሰን ግጵጽኒ ዳሰታን ኬሳ ባሶ ዙቴሬቴኖሶ?

¹⁷ ሀኦሶን አቼቻሰር ዋግጋ ቱማኖን ግእቶናክ ዛግት ፊሴሰ ኦና ኦናንሶ? ኤሰ ባሶ ቦርኣ ዋስቴ ባሶናዋ ዱግኖቤሲሰ ዛቦሲ ጋንደራ ፋእቴና ባሶቴኖሶ?

¹⁸ ደይ ኤሰ አጃጃዋ ቤያ ባሶትን ሰንና ሻካናን፡- «ቤይሳናሲክ እፋ ግርሶነዉዛ» ይራ ቴይናሰ ኦና ኦናንሶ?

¹⁹ ኤሴ ግሩ ችማ ቤየቴሰ አማንቶ ቤዮቤሲሰታን ካብ ችዋ ሰንባሶንቱ ቢፊኒዋ።

4

ሀኦሰ ዳራባሲክ እምና ቤይሳኒ አብድ

¹ ኤሰ ባሪ ቦርኣ ባር እኖክ እማና ቤይሳኒ ድማሲ ግሩኒክ ኤጰታኒ አብዱሰ ሀሽኑ ዛግራ ፋር ሰንና ቦርኣ ንቶሰን ኤሰ ቤይሳኒ ድማሲ ግሩኒ እጣ ዳንኖይ ፋእቶኖይናማቶ እንኖ ዙታምኒሴ ቲትኒትሶን ኦዳንዋ።

² ማእ ኦዱሶን ባሶ ኦደሴቴሲማቶ እንኖ ደይ ኦደኒዋ። ሰኑንታኖ ባሶ ኦደሴቴ ካማሶን አማንቶክ እነ ኤጰቶሶቶ ሰንና ቦርኣ ባሶክ እነ ኬእ።

³ ባሳ ዋስቶሰ ሀን ዳሰ ቴሰቴናኔን ካብራ ኮእራ ፋር ሰንፋናክኑ፡- « ነታ ባሶክ እማና ቤይሳኒ ድማሲ እሳንነ እፋ ግርሶነዉዛ» ይራ ግእናሲክ ቲይቻዋ» ይናሲማቶ ሀሽኑ አማነፊ እንኖ ኤሰ ሀኦ እኖክ እማና ቤይሳኒ ድማሲ ግሩኒዋ።

4 ናፋንሳ ዋናሲ ችዋክ እሳ ድምታ፡- «ሀኦስ ዋስቴት ፋና ዋስቶሲክቶታን ናፋንሲናሪ ዋኖ ቤይሳ ኤጲ» ይሰቴዋ።

5 ኤሲስማቶ ሀን ድማሰታ ሄፕሳ ደይ፡- «ታ ባሶክ እማና ቤይሳኒ ድማሲ እሳንነ ኣፋ ግርሶነ ዉዛ» ይዋ።

6 ኤሰ ባሶ ማኢ ኦዲሶን ዜምሜ ኦደሴ ባሶ አጃጃምቶ ቤዮቤሲሰታን ካብ ችዋ ኣነ ግርሶቶዋ። ሰንፋናክኑ ኤክ ግርሶነክ ፋቃድቴና እሳ እሳ ሜያ ፌሴቴር።

7 ኤሰ ባር ደይ ዜምማ ማክቴናሲማቶ

«ሀውኛ ካምባሶን ኦደፌት ካባሲክ፤

ንብኒትሶን ኦደ ቤያር ዛጉትታዋ።»

ይት ሀኦሲ ሾዋ ነያኔን ኦርፎ ዳዊትኒኪ ካሞ ማኬና ካማሰ «ሀውኛ» ይሰቴራ ቴግቴ ዋናሰ ቡዲባሲክ ፋቶ ሰንናማቶ አርቴዋ።

8 እያሱ ቤይሳኒ ድማሶን ባሶክ እም ሰንፋናነ ሀኦስ ሄፕሳ «ሀውኛ» ኡክ ኦማ ዋን ኒ ችዋ ማኮና ካባታዋ።

9 ኤሴ ሀኦስ ቤይሳ ኤጵናሰነ ፋ ቤይሳ ዳራሲክ ሀሽኑ ፋእቴራ ፋርዋ።

10 ሀኦስ ዋስቴት ፋና ዋስቶሰታን ቤይሳ ኤጵናማቶ ደይ ሀኦስ እማና ድማሲ ግርሶኒ ባሶ ደይ ዋስቴት ፌሴቴ ዋስቶቤሲሰታን ቤይሳ ኤጵነዋ።

11 ኤሰ ባሪ ቦርኣ ኦኑ ኤሰ አሱኒ ሜኒ አጃጃምቶ ቤያሲክ ዘኑሰቴሬ ጋንዶናይኒማቶ ኤክ ሀኦሲ ቤይሳኒ ድማሲ ግሩኒክ ካቦኒዋ።

12 ሀኦሲ ካማ ሀየዋ ደይ ዋስቴርዋ። ሄፕ ካድባ ፋና ሲፎሰታን ደናሎኖን ካጋዋ። ካሶንናዋ አያናሶንና፤ አቱሲኪ ርቡሶንናዋ ጎኡሶንና ኦር ኦር ክሱናኔን ካርአርዋ። ንብባሲ ኣቸራ ፋ ሳፋራሴዋ ኤናንቶሴ አሲን ቱእኒራ ማቫሱ ካርአርዋ።

13 ሀኦሲ ሰናን ኣቸኒ ቴሰቶ እሳንነ ኣፋ። ባሪ ሰናሰታ ዙታምባሴ እምማ ደይ አታቴ ሰንናቴ ቤሰቴፋዋ። እንኖ ደይ ዋልጉባ እማኒሰ ኤሰ ባሪ ሰናዋ።

የሱሰ ማግኒ ጋኝኜ ሜኒ ጋኝታኒ ደናሎዋ

14 ኤሴ ሳማሲክቶኖን አቴ ደን ሳማ ኬሳ አካም ማግኒ ጋኝኜ ሜኒ ጋኛ እኖክ ፌር ሰንና ቦርኣ አማንቶኒሶን ዛግራ ኤጲኒዋ። ኤሰ ማግኒ ጋኝኜ ሜኒ ጋኝኛሰ ደይ ሀኦሲ ና የሱሰዋ።

15 እኖክ ፌ ማግኒ ጋኝኜ ሜኒ ጋኝኛሰ እንኖ ሆፕያሲክ ከናሽቶክ ችማርዋ። ባር ዙታምባሴ አሲክ እንኖሲማቶ ፋታንቴ። ሰኑንታኖ እሳ ቦርኣኑ ኣነ ዋስቶዌ።

16 ኤሴ ፋኪያ ኤጰቶኒክናዋ አርጋሱ እኖክ ሾልሲፋና ካባሲክና ኦቲምባሶን ዳናኒክ ኦቲምባ ፋና ኤክ ሀኦሲ ዝግሞኪ እሳ ድጋ ፎንቶኖን ታእሲቲዎ።

5

1 ማግኒ ጋኝኜ ሜኒ ጋኝኛሰ እሳርባ እሳርባሰ አሱኒ ሜኒ ጋንያሰን ኮርቴሬ ሀኦሰኔን እነ ኡጵሱኒ ችዋሲክ አሱኒ ሜኒ ኤድዴ ሰንነ ማባሶንናዋ ማአሶንና እማክቱ ታትቴፌ።

2 ባር ቱትባሲክ ሆፕባ ፋናር ሰንና ቦርኦ አሩዴይ ባሶትንናዋ ዳጌፌ ባሶትንና ኬናሸቶክ ብያናክ ችማና።

3 ባር ቱትባሲክ ሆፕባሲ ቦርኦ ቦርኒ ፋክያ ቤሰቶናክ ዛግፋ ማአሶን እማናክ ሾልሲናሰ ዳራሲክ ኮኦባ ሰንኖይናሮን ባሳ ቱታሲክኔቻዋ።

4 አርንኒሲማቶ ሀኦሲክ ቱግቴር ሰና ሻካናነ ኦኑ ሀን ኡልፍናሶን ባሳ ቱታሲክ ኤጰቶናክ ኣፋ ችማናዉዛ።

5 ኤሲሰማቶ ክርሰቶሰ ማግኒ ጋኝኜ ሜኒ ጋኛ ሰናሶን ባር ቱትባሶን እነ ኡልፍንሱዌ። ሰኑንታኖ ባር ማግኒ ጋኝ ሜኒ ጋኛ ሰናሲ ኡልፍናኖን ዳንናሰ፡-
ነ ታክ ናታዋ፡-

«ታ ሀውኡ ኔን ኮኒቻዋ»

ይ ሀኦሰክቻዋ።

6 አማ ድማሰታ ደይ ሀኦሲ፡-

«ሜልኬሴደቅኒ ማግ ሰንናሲማቶ፤

ነ ኮኦባ ፎንቶኖን ማግዋ» ይፋዋ።

7 የሱሰ አሱ ሰንነ ሀን ዳሰታክ ፌና ካባሲክ ክቱን ፋኦናክ ችምኒ ሀኦሰኪ አካማ ቻጋክናዋ አካማ ሀራፋክና ማምሱነዋ ሺጶነ ዛግ። ጋራማክ ቱትባሶን አጃጃሜር ዛጉባሲክ ሀኦሰ ሺጶባሶን ኦደ።

8 ሀኦኒ ና ሰንፌናክኑ ኤጰቴና ሻናሲን አጃጃምቶሶን አራ።

9 ዮኡባ ፎንቶ ሰንነ ቤሰቴናኔን ኦርፎ አጃጃሜፌ ባሶ ዙታምቤሲሴ አሲክ ኮኦባ ፎንቶ ፋሩሲክ ኡግና ሰኒ።

10 ኤሰ ባሪ ቦርኦ ደይ ሀኦሰ ሜልኬሴደቅኒ ማግ ሰንነ ታቶሰነ ፋሮን ማግኒ ጋኝኜ ሜኒ ጋኛ ዛግራ ታትሲ።

አሱኒ ሜያ አማንቶቤሲሶን ቤዮናይቲማቶ ቱትቤሲሶን ኦዶነክ እምቲ ኪቶ

11 ሀን ችዋሲክ ማኮኒ ዉዛ ሾዎ ፋርዋ፤ ሰኑንታኖ ያዳቶኒ ሀግናንትሰ ጋር ሰንና ቦርኦ ንቶክ አሰሱሰ ራኮዋ።

12 ሀሽኔን ካርእ ፋ ኤፋቴና ዎናሲክ ንቶ አሰኛ ሰናቲ ካባዋ፤ ሰኩንታኖ ሀኦሲ ካምኒ ቴሱኒ አሱሶን ኦም አሱ ሄፕሳ አሰሱናክቱ ሾልሱዋ። ኤስ ባሪ ቦርእ ንቶክ ሾልሲፋስ ሻቦታኖ ችማ ሙታዋ።

13 ሻቦ ኬሽቴፋ ባር ዙቴራ ዳጋ ናዋ ሰንና ቦርእ ማእሶን ማቶሰታን ኮሪሬ አሩ አፋ ችማናዉዛ።

14 ሰኩንታኖ ችማ ሙ ሾልሲና ባሶ ማእ ዉዛሴዋ ማቶ ዉዛሴ አሲን ኮሪሬ ክሱኒ አሩቤሰ ፋና አሱኒ ሜያዋ።

6

1 ኤሴ ክርሰቶሰኒ ችዋሲክ እምቴ ቴሱኒ አሱሰታን ኣታ ኤክ ችማ አሰሱሲኪ ሀማኒዋ፤ ክቱ ዋሰቶሰን ሀርሙኒ ችዋሲክናዋ ሀኦሲክ አማንቶኒ ችዋሲክና አሲ ካፕታሶን ሄፕሳ ዋል ላ ካፑታኒታ።

2 ኤሲሰማቶ ሀጹቅቶሶን፥ ኩሹክ ታኡሶን፥ ክቱን ካቡሶን፥ ኮእባ ፎንቶ ማቶሱኒ ካርኣሲ አሱኒ ችዋሶን ሄፕሳ ዋል ላ ካፑታኒታ።

3 ሀኦ እያና ኤስ ባሮን ዛጉኒ።

4 አማንቶቤሲሶን ሞርሜ አሱኒ ሜያኖን ሀርምሬ ዋልሶነክ ዛጉ ኣካክ ችምቶኒሪንሶ? ኤስ ኤፌቴና አሱኒ ሜያ ዜሞ ባሶክ ቻሬፋ ቻሬራ ፋር። ሳማኪ እማሶን ቤቶሬ ቢሬ ፌሴቴር። ኮርቶ እያናሰኔን እነ ሃኤር ሰንነ ፌሴቴር።

5 ሀኦሲ ማእ ካማኖንናዋ ሀኔንቲ ዮኒ ዎናሲ ሁግናኖንና ቤቶሬ ቢሬ ፌሴቴር።

6 ኤስ ኤፌቴና አሱኒ ሜያ አማንቶቤሲሶን ሞርሜሴፋቴነ ባሶ ቴትቤሲሲክ ሀኦሲ ናኒን ሄፕሳ ዋልግሬ ሱቴሴፌ ቦርእናዋ እምማኖን ሳልጲሲሴፌ ቦርእና ባሶትን ሀርሙሶነክ ዛጉ ኣፋ ችምቶና ዉዛ።

7 ሾዋ ዎና ባሪሰታ ኬሬት ፋ እርሶን ኡሸፋ ባሬዋ ቡለፌ ባሪክ ደይ ጋና እምፋ ዳሴ ሀኦሰኪን ኤብባ ዳናና።

8 ሰኩንታኖ ሴርነዋ አሴዉነ ካይጋናነ ዋግባ ፎንቶቱ ሰናና፤ ኤርዉቶናክ ደይ ታእ፤ ባሪ ኮኣሰ ደይ ጌሲ ኪችዋ።

9 ሹንቶ ሜያነ! ሀን ባሮን ማኬፋናክኑ ንቶ ፋሩንቲሶን ኤጳ ዮኒ ማእ ዉዛንቲ ፋናማቶ እንኖ ፋቶክ አሪፌኒዋ።

10 ሀኦሰ ፋቶክቱ ማቶሱ ካርፋዋ። ኤስ ባሪ ቦርእ ዋሰቶኒትሴዋ ዜሞ ሰኩን ሀሽቲ ፋ ኮርቶኒ ሜያኖን አርጋሱንቲሴ አሲክ ባሪ ሱናሲክ ዛግሴት ኬሽታናሶን ኣፋ ዳጎናዉዛ።

11 ኒቶ ዙታምኒትሴ አብድክ ኦዴት ፋሴት ወዛሶን ኩሹንትሲ ኤጳ ጌዳቲ ካባኔን ዱዶንትሶን ሀምማ ኮእባሰታ ካርእና ካባኔን ቤሱትክቱ ቸኒራ ኤናንቴፌኒዋ።

12 ኤናንቴፌኒሰ አማንቶክናዋ ፋኪያክና ዛግሬ የሮክ እምቲ አብዲሶን ዋራሶኒ አሱኒ ሜያን ፌር ሰናትክታኖ አዉጃ ሰናትክታዋ።

ሀኦሲ አብድ አማናምቶ ሰንባሰ

13 ሀኦሲ አብራሀምኒክ አብድ እምፋና ካባሲክ ባር ቲጌራ ቲዉናክ ባሪሰታን ደናሎ ኦም ኦኑ አፌ ሰንና ቦርእ ኤካ ይት ባር ባሪ ቲታሲክ ቲይ፡-

14 «ፋቶሲክ ኔን ኤቢሱናዋ፤ ዛልኔሶን ደይ ሾዎሱናዋ»

15 አብራሀም ፋኪያክ ኦደ ባሪክ እምቲ አብዲሶን ዳኒ።

16 አሱኒ ሜያ ቲይሴፌ ካባሲክ ባሪሰታን ደናሎ ሰና ሱና ቲግሴሬቱ ቲይሴፌ። ዋሉምቤሲሶን ቲያክ ዛግሴሬ ባሪ ጋነያሲ ፋ ክርክሪሶን ዙትሬ ትሸክሴፌ።

17 ኤሲሰማቶ ሀኦሲከን ቡድ አላማባሰ ሶልቶኖር ሰንባሰን እምማኖን ቤሱናክ ሾሌፋት አብዲሶን ኤጴቶኒ ባሪክ ቲያክ ዛግ።

18 ኤሲሰማቶ ሀኦሲ ሀን ሄፕ ሶልቶኖይ ባሪ አብዲሶንናዋ ቲያሶንና እኖክ እሚ፤ ኤሰ ባር ደይ ሀኦሲ ኤሻክ ኣነ ችምፋ ሰንና ቦርእ ሰኒሰታ ፋ አብዲሶን ዛግራ ኤጳክ ባሪከ ኤልሌ ሀማ እንኖ አካማ ችማቱ ዳንኒዋ።

19 ኤሰ አብዲሰ ካኒሲክ ማርካቢሰ ሾርኮኖይናማቶ ዛታ ዬትፋ ብታሲማቶዋ። ኤሰ አብዲሰ ይኑሶን ኣታ ሰርኪ ባግቶሪ ግር።

20 የሱሰ ሜልኬሴደቅኒ ማግ ሰንነ ታቶሳማቶ ኮእባ ፎንቶኖን ማግኒ ጋኝኚ ሜኒ ጋኛ ሰንነ እኖክዋ እያት ዜምሜ ሰር ግሪዋ።

7

ማግኒ ጋኝኚ ሜኒ ጋኛ ሜልኬሴደቅ

1 ሜልኬሴደቅ ሳለምኒ ታቶ፤ ደይ ዙታምባሴ አሲሰታን ደናሎ ሰና ሀኦሲ ማግዋ። ኤሰ ሜልኬደቅ አብራሀም ታቲ ሜያኖን ሜሬሬ ዋልፊና ካባሲክ ኡግናሰታክ ኡጳሬ ኤቢሰ።

2 አብራሀም ደይ ኤጵና ዉዛ ዙታምባሴ አሲሰታን አሲሪሰን አሳሮን ኪሰሬ እሚ። ሜልኬሴደቅን ሱናሲ ኮታ እሶንሳ፡- «ኦኮ ታቶ» ኦማ፡- «ሳለምኒ ታቶ» ወደይ «ናጋኒ ታቶ» ኡዋ።

3 ሜልኬሴደቅ ትቻክ አርቲ አባናዋ እንቶነ ወደይ ኮንቶኒ ቱዝባ አፋ፤ ኔባሲ ቱሱ፤ ካክ ፎና ዎጋባሲክ ደይ ኮእባ አፋ። ኤስ ሜልኬሴደቅ ሀኦሲ ናኒ ቤሶኒማቶ ኮእባ ፎንቶኖን ማግ ሰንነ ፎና።

4 ሀን አሱ አካነ ፌ አካም አሱ ሰንናማቶ ቢትዋ፤ አሲቴሴሪሲ ቱዝኒ አባ ሰና አብራሀምኑ ቦጃክ ዳንና ወዛሰን አሲሪሰን እሳሮን ኪሰፊ እሚ።

5 ኤስ ባሶ ማግኒ ሜኒ ዎስቶሰታ ዎስቶሶነክ ፋድቴፌሰ ሌዊኒ ዛላሲክቶ ሰና ዳራሳሰን አብራሀምኒ ዛላሰን ኤሲሰኑ ደይ አይቤሲሳክቶኒኪን አሲሪሰን እሳሮን ኤጶነክ ቱማሰ ባሶክ አጃቹዋ።

6 ኤስ ሜልኬሴደቅ ሌዊኒ ሜኒ ዛላ ሰና ቤይፌናክኑ አብራሀምኒኪን አሲሪሰን እሳሮን ኤጶ። አብድኒ ካማ እምቴና አብራሀምኒን ደይ ኤቢሰ።

7 ጋሮስ አሪኪሳታን ኤባ ኤጶቶና ባር ኤክ ሀቻ ኡባ አፋዋ።

8 እሳ ካድባሲክ አሲሪሰን እሳሮን ኤጶፌሰ ክቱኒር ሰና ባሶዋ። ሰኑንታኖ ኦማ ኡግናሲክ ደይ አሲሪሰን እሳሮን ኤጶፌ ባር ሀየዉ ሰንነ ፎናማቶ ዛላ ማክቴና ሜልኬሴደቅዋ።

9-10 ኤሴ ሜልኬሴደቅ አብራሀምኒን ኡጶና ካባሲክ ሌዊ አባባ አብራሀምኒኪን ሀሽኑ አነ ኮንቶዌ ሰንና ቦርእ አሲራትሶን ኤጶናክ ሾልሲናሰ ሌዊ ቱትባክ አብራሀምኒኪ ካሞ አሲሪሰን እሳሮን ካሲዋ ኡዋ።

11 ኤሴ ዳራሲክ ቱማ እምቴናሰ ሌዊኒ ማግ ሰንነ ዎስቶሰኪ ካሞዋ። ኤስ ሌዊኒ ሜኒ ዎስቶሲክ ቱማ ሰኒ ሰንፋናነ አሮኒ ማግ ሰንነ ታቶስ ሰንኖይናሮን ሜልኬሴደቅኒ ማግ ሰንነ ታቶባ ፊና ኦም ማግ ዮና ባር ሾልሱና ካባታዋ።

12 ማግ ሰኒ ቱዛሰ ሶልቴፋና ካባሲክ ቱማሰ ደይ አነ ሶልቶናክ ሾልሱዋ።

13 ሀን ባር ዙታምባሴ ባሪክ ማክቴና ማግሰ ኦማ አሲቴሴርክቻዋ። ኤስ አሲቴሴሪኒ ሾኦሰታ ታእሴሬ ዎስቴር ኦኑ አፌዋ።

14 ዳምኒሰ ዩዳኒ ሜኒ አሲቴሴሪ ሰንባሰ አርቶዋ። ሰንፋናክኑ ሙሴኒ ማግ ሰንነ ችዋሲክ ማኬፌና ካባ ዩዳኒ ሜኒ አሲቴሴሪሶን ቤሲራ ማኬና ዉዛ እሳንነ አፋዋ።

ክርስቶስ ሜልኬሴደቅኒሲማቶ ማግ ሰንናማቶ

15 ሀን ዉዛሰ ኦምማ ሰንና ፎናሰ ሜልኬጄደቅኒሲማቶ ኦም ማግ ካብፌና ካባሲክዋ

16 ባር ማግኒ ሜኒ ታቶሶን ኤጵናስ ትሹኖይ ኮእባ ፎንቶ ካኒ ሁግናሲክታኖ ዛላሲ ቱዛኪን ያ ቱማሲ ሰትሪክታዋ።

17 «ሜልኬሴደቅኒ ማግኒ ታቶሲማቶ ነ ኮእባ ፎንቶኖን ማግዋ» ይሰቴራ ባሪክ ዛላ ማክቴዋ።

18 ዜምማቲ አጃጂሰ ሆፕያ ደይ ኬእኖር ሰንና ቦርኦ ሻርቴዋ።

19 ሙሴኒ ቱማሲ ኦኒንኩ እሳንነ ቱማ ዛጉክ እነ ችማ። ሰኩንታኖ ሀሽ ሀኦሲክ ታኦኒክ አካማ አብድ እኖክ እምቴዋ።

20 ኤሰ ባርሰታን ኦማ ሀን ማግ ሰናሰ ሀኦሲ ቱያ ፎንቶኖን እነ ሰናዋ። ኤሰ ዜሞ ሰናክ ማግ ሰነ ባሶ ቱያባ ፎንቶኖንቱ ሰነቴዋ።

21 ሰኩንታኖ የሱሰ ማግ ሰንናሰ ሀኦሲ ቱያክዋ። ኤሲሰ ደይ፡- «ዳሚሰ፡- ነ ኮእባ ፎንቶኖን ማግዋ» ይራ ቱይ፤ ኤሰ ሳፋራባሰ ደይ ኦፋ ሶሎና ዉዛ» ይሰቴራ ባሪክ ማክቴናሲማቶዋ።

22 ኤሰ ቱያሲ ቦርኦቱ የሱሰ ኤሰ ባርሰታን ደናሎ ቱያኒ ካማሲክ ዋሲ ሰኒዋ።

23 ክቱሲ ቦርኦ እሳ ማግ ሶልቶኖይፊን ዋሰቴፊና ዋሰቶባሰታክ ኮእባ ፎንቶኖን ፎክ ኦፋ ችማናዉዛ ሰንና ቦርኦ ዜሞቲ ማግኒ ሜያ ፋድቤሲሰ ሾዋዋ።

24 ሰኩንታኖ የሱሰ ኮእባ ፎንቶኖን ፎኒር ሰንና ቦርኦ ማግ ሰንባሰ ሶልቶኖርዋ።

25 ኤሰ ባሪ ቦርኦ ባሶክ ናቱክ ኮእባ ፎንቶኖን ሀየዉ ሰንነ ፎኒር ሰንና ቦርኦ ባርኪ ካሞ ሀኦሰኪ ዬሴፊ ባሶትን ዙትሬ ፋቱክ ችማናዋ።

26 ኤሲሰነ ፊ ኮርቶ፤ ዝናባ ፎንቶ፤ ካይም፤ ቦርኒ ሜያሰታን ኦር ኬሴ ኮርቶ፤ ሳማሰታን ደናሎ ቴግ ሰና ማግኒ ጋኝኚ ሜኒ ገኛሰ እኖክ ሾልሱዋ።

27 ባር ኦም ማግኒ ጋኝኚ ሜኒ ጋኝኒማቶ ዜምሜ ባሳ ቱትኒ ቦርኦሲክ፤ ኦርፎ ደይ ዳራሳ ቦርኒ ቦርኦሲክ ዋንና ዋንና ማኦ እማናክ እነ ሾልሲፋዋ። ቱትባሶን ማኦ ዛግሬ እምና ካባሲክ ሀን ዉዛሶን ሄፕሳ ዋሉኖይናማቶ ዛግሬ ኮእሲዋ።

28 ቱማሰ ማግኒ ጋኝኚ ሜኒ ገኛ ዛግሬ ታትሲፋናሰ ሆፕ ሰና አሱኒ ሜያኖንቻዋ። ሰኩንታኖ ቱማሰኔን ኦርፎ ያ ቱያሰ ኮእባ ፎንቶኖን ቱማ ሰና ሀኦሲ ናኒን ታትሲዋ።

8

የሱሰ ጋድዶ ቱያሲ ማግኒ ጋኝ ሜኒ ጋኛ ሰንናማቶ

1 ኤሴ ዋሎኒ ወዛሲክቶሰን አሪክሰ ሀኒሰዋ፡- ሳማክ ዙታምባሴ አሲሰታን ደናሎ ሰና ሀኒሲ ዝግሞኒ ሆኦታ ቲሻሰታ ድ ኤፌቴና ማግኒ ጋኝኙ ሜኒ ጋኝኒ እኖክ ፊርዋ።

2 ባር ዋሰቲት ፊናሰ ፋቶኒ ዱርካኒ ሰና ሜቅዴሲሲዋ። ኤሰ ዱርካኒሰ ቶክቴናሰ አሱኒ ኩሹክ ሰንኖይናርን ዳሚሲክዋ

3 ማግኒ ጋኝኙ ሜኒ ጋኛ እሳርባ እሳርባሰ ታቴፊናሰ ማባነዋ ማእነ አሲን እማናክዋ። ኤሰ ባሪ ቦርኣ ኤሰ ማግሰ ደይ እማና እሳ ወዝባ ፎናክ ሾልሱዋ።

4 ቱማሲማቶ ማባሶን እሜፌ ማግኒ ሜያ ፊሴቴር ሰንና ቦርኣ ባር ሀን ዳሰታኪር ስኒ ሰንፋናነ ማግ ሰናና ካባታዋ።

5 ሀን ማግኒ ሜያ ዋሰቴሴፌ ዱርካኒሰ ሳማኪ ፋ ባሪ ቤሶነዋ ይራራነ አሲክ ኮእባዋ። ኤሰ ባር ደይ ሰንናሰ ሙሴ ዱርካኒሰን ዋሰቴፊና ካባሲክ ሀኒሰ፡- «አማሰታክ እምማናን ኔክ ቤሲናሰነ ፋርን ዙታምባሴ ማእሰራ ኦዳ ዛጉዋ» ይራ እጃጀናሲማቶዋ።

6 ሰኑነታኖ ሀሽ የሱሰ ጋነኒር ደይ እሳር ዛግና ቴያሲ ኩርኡ ቴያሰታን ደናሎ ሰና አብዱሰታ የፊር ሰንናማቶ ባሪክ እምቴ ዋሰቶሰ ደይ አርኪርዋ።

7 ዜምማቲ ቴያሰ ዝናባ ፎንቶ ሰንና ቤሰቴ ሰንፋናነ ሄፕሳኒ ቴያሰ ሾልሱና ካባታዋ።

8 ሀኒሰ ዳራባሳታ ዝና ፎባሶን ቤሱክ ኤካ ይፋዋ፡-

«ኤሴ እሰራኤልኒ ዳራሰኔንናዋ ዩዳኒ ዳራሰኔንና፤

ጋድዶ ቴያኒ ካማ ግሩና ዎና ዮናዋ»

ይፌዋ ዳሚሰ።

9 «ኤሰ ቴያሰ ደይ ኩሹቤሲሶን ኤጳ ግጽጽኒ ሜኒ ዳሰታን፤

ባሶትን ክሰፋና ካባሲክ፤

ባሶ አባሰኔን እነ ግሪና ቴያሰነ ፋርታዋ።

ባሶ ታ ቴያኒ ካማሲክ ኣነ የርሶቶ ሰንና ቦርኣ፤

ታ ደይ ካሸቻዋ»

ይፌዋ ዳሚሰ።

10 «ኤሴ ሀን ዎናሰኔን ኦርፎ፤

እሰራኤልኒ ዳራሰኔን እነ፤

ግሩና ቴያኒ ካማሰ ሀኒሰዋ፤

ይፌዋ ዳሚሰ፤

ታ ቱማሶን ባሶ፤

ካኑሰሲ ፎናክ ዛጉና፤

ንብቤሲሰ ደይ ትቹና፡-

ታ ደይ ባሶክ ሀኒቤሰ ሰናና፤

ባሶ ደይ ታክ ዳራ ሰና።

- 11 «ዳሚሰን አሩዋ» ይሬ ዋልኮባሰን ሰኑን፤
 አይባሰን አሱኒር ኦኑ አፋ ፎና ወዛ፤
 ጋሮሳታን ካብራ ሀምማ፤
 እርኪሳታ ካርአና ካባኔን፤
 ዙቴሬ ታን አርሶነ፡-
- 12 ማጃሱቤሲሶን ፌሹን ኡና፤
 ቦርቤሲሶን ደይ፤
 አፋ ዋላ ያዳቶና ወዛ።»
- 13 ኤሱ፡- «ጋድዶ ቴያኒ ካማ» ይፋና ካባሲክ ሰናቲ፡ ቴያኒ ካማሶን ኩርኤ ዛጊዋ ኡዋ። ኤሰ ባሬ ቦርኣ ኩርኣ ባሬዋ ኩርኤ ወዛ ዙታምባሴ ትሹና ዋናሰ ታእሴዋ።

9

ሳማኪ ቤቴሜቅደሲሲ ሀን ዳሰታኪ ባርሰታን ደናሎ

- 1 ቴሱኒ ቴያኒ ካማሰ ሺጶኒ ሰትርባሬዋ ሀን ዳሰታኪ ደይ ሜቅደሰባሬ ፋርዋ።
- 2 ሄፕ ባግቶባ ፋና ዱርካኒ ሆሬራ ፋር፤ ማቅሬዝነዋ ታራቤዛነ፤ ደይ ማእኒ ዳቦሴ ባርሲ ፋና ቴሱኒ ባግቶሱ፡- «ኮርቶ» ይሰቴት ፋር።
- 3 ሄፕሳኒ ይኑሲ ኦርፎሲ ፋ ሰርኪ ባግቶሰ «ኮርቶሲ ኮርቶ» ይሰቴት ፋር።
- 4 ኤሰ ባግቶሲ ዋርቄኒ ክርቅዳነዋ ዋርቄ ማቶ ቴያኒ ካምኒ ታቦታባሰ ሰር ፋር። ኤሰ ቴያኒ ካምኒ ታቦታሰ ማንናባ ሰሩክ ፋና ዋርቄኒ ማሱብ፤ ቶሽባ ኮታ ድ ኣርኒ ሃሮሰ፤ ደይ አሲር አጃጂሲክቶ ትቼራ ፋና ካቶ ሹኣሰ ሰሩክ ፋሴር።
- 5 ታቦታሰታክ ደይ ፋ ቦርኒ ካይምሱኒ ኡካሶን ኮሶቤሲሲክ ይኑኒ ኡልፍናኒ ክሩቤሊሰ ደይ ፋሴር። ሰኑንታኖ ኤሰ ወዛሲክቶኖን ዙትራ ሀሽ እሳርባ እሳርባሲክ ማኮክ አፋ ችማኒ ወዛ።
- 6 ዙታምባሴ ኤሲሰማቶ ሆሬናኔን ኦርፎ ማግኒ ሜያ ካይኑን ዋሰቶቤሲሶን ኮእሱክ ዱርካኒሲ ቴሱኒ ባግቶሲ ዋንና ዋንና ግርሴፌ።
- 7 ሰኑንታኖ ሄፕሳኒ ባግቶሲ ፋ ሰርኪ ባግቶሲ ግሩኒሰ ማግኒ ጋኣኚ ሜኒ ጋኣ ሰና ባር ባር ኮእባዋ። ሰር ግሩናሰ ደይ ዋጋሰን እሳ ዋና ኮእባ። ባር ደይ ቴትባሲ ቦርኣክናዋ ዳራሰ ዳጋክ ዛግና ቦርኣሲክና እማና ሀንናሶን ኤጽኖይ ሰር ኣነ ግሬፌ።

8 ቴሱሲ ዱርካኒስ ፋና ካባኔን ኮርቶሲ ኮርቶ ኤጳ ሀሚኒ እግናስ ሀሽኑ አምማኖን እነ ኬሳ ቤስቶዋ ሰንናማቶ ኮርቶ አያናስ ቤስፋ።

9 ኤስ ባር ደይ ሀን ፋ ዋናሲክ ቤሶዋ። ኤስ ኤፋቴና ወዛሲክ አምቴፋ ማባሲክቶነዋ ማኣሲክቶነ ሺጵሴፌ ባሶ ካኑሶን ኮእባ ፎንቶኖን ካይኑናክ እነ ችምፋ።

10 ሙኒ ችዉነዋ ኡሽኒ ችዉነ ደይ ኦማ ኦማ ካይምኒ ችዋሲክቶ ዋስቴት ፋናስ ሀን ጋድዶ ሰትሪስ ዮና ካባኔን ኮእባዋ።

11 ሰኑንታኖ ክርስቶስ ዮናክ ፋሴ ማእ ወዛሲክቶ ማግኒ ጋኝኜ ሜኒ ጋኛ ሰንነ አምማኖን ኬሴ ቤስቴ። ባር ግርና ዱርካኒስ አካማኖን እኛ ደይ ዮኡባ ፎንቶዋ። ኤስ ዱርካኒስ አሱኒ ኩሹክ ዋሱስቶኖር ደይ ሀን ቴስቶስኪን ሰንኖርዋ።

12 ባር ኮርቶሲ ኮርቶሲ ሄፕሳ ዋሉኖይናማቶ እሳርጋ ባሳ ሀንናሶንቱ ኤጼ ግርቴኖ ፍዞሲክቶኒ ሀንናነዋ ዝብቻሲክቶኒ ሀንናነ አሲን እነ ኤጼ ግሩዌዋ። ኤስ ኤፋቴና ወዛሲክ ኮእባ ፎንቶ ፋሩኒ ፋሪሶን ኮኖክ እሚዋ።

13 ፍዞሲክቶኒ ሀንናነዋ ኦሞሩሲክቶኒ ሀንናነ ማእክ ኪቼ አዛታ ሚኒ ቤድናስ ቦርእክ ኪና አሱኒ ሜያሰታ ውርቴፋና ካባሲክ እሽኒ ዝናሰን ባሶትን ካይንራ ኮርቶ ዛጉኒር ሰንናኔን፤

14 ኮእባ ፎንቶ አያናስኪ ካሞ ቴትባሶን ዝናባ ፎንቶ ማእ ዛግሬ ሀኡሲክ አምና ክርስቶስኒ ሀንናስ ሀየዋ ሀኡሲክ ዋስቶኒክ ካኑኒሶን ክቱ ዋስቶስን እዉነ ፋሮን አሪክሰራ ካይምሱንጋሶ?

15 ኤስ ቴግቴ ባሶ ሀኡስ አብድክ አምና ኮእባ ፎንቶ ርስትሶን ኤጼቶሶንክ ክርስቶስ ጋድዶ ቴያኒ ካማሰ ጋነያ ሰኒዋ። ኤስ ባር ደይ ሰንናስ አሱኒ ሜያ ቴሱኒ ቴያኒ ካማሲ ሰካሎሲ ፌሴፋት ዋስቴሴቴ ቦርኣስን ፋኦናክ ክቱባሲክዋ።

16 ማክቴ ፋፎ ፋናኔን ኤስ ፋፎሶን ማኬ አሱስ ክቱባሶን ጋሳሱ ሾልሲፋዋ።

17 ፋፍቴ ካማሰ ዋስቶታ ፌሻናስ ፋፌ ባር ክትናኔን ኦርፎዋ። ሰኑንታኖ ፋፌ አሱስ ካክ ፌን ፋፌና ካማሰ ዋግባ ኣፋዋ።

18 ኤስ ባሪ ቦርኣ ቴሱኒ ቴያኒ ካማሰ ሀንና ፎንቶኖን ኣፋ ዛጉና ዉዛ።

19 ቴሱሰታ ሙሴ ቱማሲ እጃጅኖን ዳራ ዙታምባሴ አሲክ ማኬ። ኤሴን ኦርፎ ዝብቻኒ ሀርንነዋ ፍዞኒ ሀርንነ አካኔን እነ ዋእሰሬ ቱማሲ ማፃፋታናዋ ዳራሳታና ዙትሬ ሂሶፕክናዋ ሸእ ፋንቱሲ ኤሳክና ዊርኢ።

20 ኤስ ዊርናስ ደይ፡- «ሀኦስ ንቶክ አጃጀና ቴያኒ ካማሲ ሀንና ሀኒሰዋ» ይሬዋ።

21 ኤሲሰማቶ ዱርካኒሰንናዋ ባርሲ ዋሱሰቴፋ ኮዳ ዙታምባሴ አሲሰታና ዊርኢ።

22 ፋቶክ ሙሴኒ ቱማሲማቶ ጋሮ ዉዛታኖ ዙታምባሴ ሀንናክቱ ካይምፋዋ። ሀንና ዉክቶኖይፊን ቦርኒ ፊሹን ኡ አፋ።

ክርሰቶስኒ ማእ ሰናሰ ቦርኣሰ ፊሹን ኡሰቶናክ ዛግር

23 ኤሴ ሀን ሳማኪ ዉዛሲክቶኒ ቤሶ ሰና ባር ዙቴራ ሀን ሰትሪሰማቶ ካይምሶንክ ሾልሱ ሰንና ፋር። ሰኑንታኖ ሳማን ሰና ዉዛሲክቶ ሀን ባሪሰታን ቻላ ሰንና ማእክ ካይማናክ ሾልሲፋዋ።

24 ክርሰቶስ ፋቶኒ ቤቴሜቅደሲሲ ቤሶ ሰና ባሪሰንናዋ አሱኒ ኩሹክ ኬቴ ኮርቶሲ ኮርቶሲ ኣነ ግሩዌ። ባር ሀሽ እንኖ ቦርኣ ሀኦሲ ሰና ቢሰቶናክ ሳማ ሀምሜ ግር።

25 አይሁድኒ ማግኒ ጋኝኜ ሜኒ ጋኝ ሰና ባር ባሳር ሰንኖይ ሀንናሶን ኤጼ ዋግጋ ዋጋሲክ ኮርቶሲ ኮርቶሲ ግሪፊናሲማቶ ባር ቱትባሶን ሾዋ ዋና ማእ ዛግሬ እማክ ኣነ ግሩዌ።

26 ኤካ ሰኒ ሰንፋናነ ሀን ዳሰ ቴሰቴናኔን ካብራ ሾዋ ዋና ሻና ኤጼቶና ባር ሾልሱና ካባዋ። ሰኑንታኖ ሀሽ ነያሲ ኮእታክ ቦርኣሶን ትሽኩናክ ቱትባሶን ማእ ዛግሬ እሳርጋ እምማኖን ኬሴ ቤሰቴዋ።

27 አሱኒክ እሳርጋ ክቱሰ እምቴራ ፋር፤ ክቱኔን ኦርፎ ደይ ማቻሱ ባሳሰታ ካቶናክ ታእኒር።

28 ኤሲሰማቶ ክርሰቶስ ሾዋኒ ሜኒ ቦርኣሶን ትሽኩናክ እሳርጋ ክት። ደይ ቦርኣሶን ዋርኣናክ ሰንኖይናርን ባሪን ኦደት ፊ ባሶትን ፋኦናክ ሄፕሳ ዋል ሌ ዮኒር።

10

1 ቱማሰ ሀንኔንቲ ዮኒ ማእ ዉዛሲክ ይራራታኖ ፋቶኒ ግቶባሰታዋ። ኤስ ባሪ ቦርኣ ዋግጋ ዋጋሲክ እምቴፋ ማኣሲክቶኖን ኤጼ ሀኦሰኪ ታኤፊ አሱኒ ሜያኖን ኮእሰራ ካይም ኣነ ዛግፋ።

2 ቱማሰ ኮእሰራ ካይምሱክ ቛማር ሰንፋናነ ሺጶክ ታኤፊ አሱኒ ሜያ ሄፕሳ ዋልጉኖይ ኡግናክ ቦርኣሰን ካይሜቴ ቦርኣናዋ ቦርቤሲ ፎንቶ ሰናቤሲሶን ካኑቤሲሰ አርቴር ሰንና ቦርኣና ማኣሲ እማኖን ቤዮነ ካባ።

3 ሰኑንታኖ ኤስ ማኣሲክቶ ዋግጋ ዋጋሲክ ቦርኣሶን ሳፋርሶነክ ዛግርዋ።

4 ኦሞሩነዋ ፍዘነ አሲ ሀንና ቦርኣሶን ፌሹን ኡክ ኣፋ ችማናዉዛ።

5 ኤስ ባሪ ቦርኣ ክርሰቶሰ፤

ሀን ዳሰታክ ዩፌና ካባሲክ ኤካ ይ፤

ማኣሲክቶናናዋ ማባሲክቶናና፤

ኔኪን ኣነ ሾሌፋት፤

ሰኑንታኖ አቱሶን ታክ ሆሲት፡-

6 ኪሹን ማኣሲክቶክናዋ፤

ቦርኣሶን ፌሹን ኡክና፤

ደይ እምቴፋ ማኣሲክቶክ ኣነ ግሮዌ።

7 ኤስ ካባሲክ ታ፡-

« ሲኦናሴ! ማፃፋሲክ ታ ችዋሲክ ትቼናሲማቶ፤

ነ ፍቃዲሶን ኮእሱክቱ ያንዋ » ይን።

8 ባሪ ደይ ቴሱሰታ ኤስ ዉዛሲክቶ ቱማሲማቶ አዋሰቴር ሰንፋናክ፡- «ማኣሲክቶናንናዋ ማባሲክቶናንና፤ ኪቼፋ ማኣሲክቶኑዋ ቦርኣሶን ፌሹን ኡክ እምቴፋ ማኣሲክቶኑ አሲን ኣኔ ሾሎዌ። ኤስ ባሪክቶክ ደይ ኣነ ግሮዌ » ይ።

9 ቱሰሬ ደይ፡- «ኤሴ፡ ታ ፍቃድኔሶን ኮእሱክቱ ያንዋ » ይ። ኤሲሲክ ሄፕሳኒሶን ኤደባሲ ዋልጉክ ቱሱኒሶን ሻሬፋ።

10 ኤስ ፍቃድኔሲክ የሱሰ ክርሰቶሰ አሻክ እሳርጋ ማኣ ሰንነ እምቴና ቦርኣ እንኖ ኮርቶ ሰኒዋ።

11 ማግሰ እሳርባ እሳርባሰ ቦርኣሶን ትሸኩክ ችምናይ ኤስ ማኣሲክቶኖን ዋልታሬ እሜት ዋንና ዋንና ዋሰቴፌ።

12 ሰኑንታኖ ክርሰቶሰ ቦርኣሲክ እሳ ማኣሶን ኮእባ ፎንቶኖን እሳርጋ እምናኔን ኦርፎ ሀኦሲ ሆእታ ቱሸታ ድ።

13 ሀንኔን ኤካሎ ጉማባሳክቶ ባሳ ዋሹሲ ሰካሎሲ ሰናንኔን ኡዳና።

14 ኤስ ባር ደይ ሰንናሰ ኮርቶ ሰና ባሶትን እሳ ማኣሰኪ ካሞ ቱም ዛግና ቦርኣዋ።

15 ኮርቶ አያናሰኑ ሀን ችዋሲክ እኖክ ዛላ ማኮና። ቱሱሰታ፡-

16 «ኤስ ዋናሲክቶኔን ኦርፎ፤

ባሶኔን ኣነ ግሩና ቱያኒ ካማሰ፤

ሀኒሰዋ ይፌዋ ዳሚሰ፤

ታ ቱማሶን ንብቤሲሰ ፎናክ ዛጉና፤

ባሶ ካኑሰ ደይ ትቼና » ይ።

17 ቱሰሬ ደይ፡- «ቦርቤሲሶንናዋ ኦሩቤሲሶንና፤

ሀንኔን ኤካሎ፤

ኣፋ ዋላ ሳፋሮና ዉዛ » ይፌ።

18 ኤስ ባሪ ቦርኣ ቦርኣስ ዙቴራ ፌሹን ይሰቴናኔን ኦርፎ ቦርን ፌሹን ኡክ እምቴፋ ማኣስ ሀንኔን ኤካሎ ኣፋ ፎና ወዛ።

ሀኦስኪ ታእሶ ሾልሱ

19 ኤሴ አይታሳክቶኖ! የሱሰኒ ሀንናሰኪ ካሞ ኮርቶሲ ኮርቶሲ ግሩኒክ ችማ ዳንኒዋ።

20 ግሩኒሰ ይኑሲ ካሞ፤ ኤሲሰ ደይ ባሳ አሻሰኪ ካሞ ጋቹና ጋድዶ ደይ ሀየዋ ሰና ኡግናሲክዋ።

21 ሀኦሲ ኬታ ሀኦሱኒ ሁግናባ ፋና አካሞ ማግኒ ፊርዋ።

22 ኤስ ባሪ ቦርኣ ማቶ ካኑኒሰን ካይማኒክ ንብኒሰን ዊርቴራ፤ አቱኒሶን ደይ ካይማ አካክ ማሴራ፤ ካይማ ንብነዋ ቱማ አማንቶን ኤጳ ሀኦስኪ ታእሶኒዋ።

23 አብድኒ ካማሶን እማ ባር አማናሞቶ ሰንና ቦርኣ አማኒኒ አብዱሶን ኤክ ሀቫ ኡኖይ ዛግራ ኤጳን።

24 ኬሽታናክናዋ ማእ ዋሰቶክና ጉዘራ ፎኒክ እሳይሰ እሳይሲክ ያዳሱዋ።

25 ዋንና ዋንና እሳ ዳ ኡጳፋፋ እኖትና እኖትና ዋል ዛጉኒሰታኖ እሳ እሳ ሜያ ዛግሴፊሲማቶ ዙቴፊኒ ዙቶሶን ቤያኒታ፤ አርክሰራኑ ደይ ዳሚሰ ዮና ዋናሰ ታባሶን ያዳቴፋት ኤስ ባርን ማእሰራ ዛጉት።

26 ፋቶኒ አሩሶን ኤጳ ታኒኔን ኦርፎ አሪፋት ሾሌራ ቦርኣ ዋሰቴፋኒ ሀንኔን ኤካሎ ቦርኒ ችዋሲክ እምቶኒ እሳ ማእ ኣፋዋ።

27 ሰኑንታኖ ሀሽ ፋእቴ ባር ሀንኔንቲ ሰንኒ ድግሱ ማቫሱኒ ካርአሴዋ እምቴሴፊ ባሶትን ሙኒ ድግሱ ጌያሴዋ።

28 ሙሴኒ ቱማሶን ኣታ ባሳሰታ ሄፕ ወደይ ኬዝ አሱኒ ሜያ ዛላ ማክሴፋቴኒ ፋክያ ፎንቶኖን ክቱናክ ዛግቴር።

29 ኤከን ሀኦሲ ናኒን ካሺ ባር፤ እኮርቶ ሰና ቴያኒ ካማሲ ሀንናኖን ከንሲ ባር፤ ባክ እምቴ አያናሶን ሜእ ባር ኣካነ ፋ አካማ ኬኦ ባሪክ ሾልሱ ሰንና ንቶክ ቤሰቴፋሶ?

30 «ኮኒ ካሰቶ ታርዋ፤ ታ ሾልሱ ኮዋሶን ካሱና» ይ ባር ኦ ሰንናማቶ አርፊኒ። ኤሲሰማቶ፡- «ሀኦስ ባሪ ዳራሳታ ማቫሱ ካርአር» ይፊዋ ዳሚሰ።

31 ኤስ ባሪ ቦርኣ ሀየዋ ሀኦሲ ኩሹሲ ጋንዶ አካማኖን ድግሱዋ።

32 ቻሬፋ ንቶክ ቻሬናኒን ሀንካሎ ሾዋ ሻና ኤጳ ታራ ፋክሴት ዜሞቲ ዋናሲክቶኖን ያዳቶሶትዋ።

33 እሳ እሳ ዋኖ አሱኒ ሰና ሜቸት፤ ራካቴት። እሳ እሳ ዋና ደይ ኤስ ኤፋቴና ሻና ካርና አሱኒ ሜያነን እነ ዞሞ ሰነት ቦርአ ሻና ኤጳ ታሴት።

34 ንቶ ማእር ደይ ዋንና ዋንና ፎኒ ኦትማኒት ሳማክ ፋናማቶ አሪት ቦርአ ታቶኒ ሜያክ ኬናሽቴትዋ። ንቶር ሰና ፎንትሰ ኦቴፋና ካባሲክ ፋክራ ኤስ ዉዛሶን ግራክ ኤጳ ታት።

35 ኤሴ አካማ ዋሱማ ዳናት አማንቶሶን ሀኡትታዋ።

36 ሀኡሲ ፍቃድኖን ዛግራ ሀኡሰ ንቶክ አማናክ ግሪና አብድኒ ካማሶን ዳናቲክ ፋክያክ ኦዳቲክቱ ሾልሰፋዋ።

37 ኤስ ባሪክ ደይ ኤካ ይሰቴራ ትቼዋ፡-

«ኤስ ዮኒ ባር ጋሮ ዋናኔን ኦርፎ ዮና፤

እፋ ደይ ዋካና ዉዛ።

38 ታር ሰና ኦኮ አሱሰ አማንቶክ ካክ ፎና፤

ሰኦንታኖ ኦርፎ ዋልፋና፤

ባሪክ እፋ ግርና ዉዛ።»

39 ሰኦንታኖ እንኖ አማነሬ ፋሪ ባሶ ኬንቴኖ ኦርፎ ዋልሴሬ ትሹኒ አሱኒ ሜኒ ኬንቴዋ።

11

አማንቶኒ ችዋ

1 አማንቶ ኡሰ አብድክ ኦዴት ፋኒ ዉዛሶን ሀን ባር ፋቶዋ ይሬ ኤጴቶዋ። ኣፋክ ቢሰቶኖይ ዉዛሶኑ ቢሰቴር ዛግሬ ፋዱዋ።

2 እቤቲ አሱኒ ሜያ ጋላታ ዳነቴሰ አማንቶክዋ።

3 ሀን ዳሰ ሀኡሲ ካማክ ቴሰቴናማቶ አሩኒሰ አማንቶክዋ። ኤስ ባሪ ቦርአ ቢሰቴፋ ዉዛ ዙቴራ ቢሰቶኖሰኪን ዋሱሰቴናማቶ አሪፊኒዋ።

4 አቤል ካየልኒ ማእሰታን ዴናሎ ማእ ሀኡሲክ አምናሰ አማንቶክዋ። ሀኡሰ አቤልኒ አማሶን ግራክ ኤጳ ታፋና ካባሲክ አቤል አማንቶክ ኦኮ ሰንባሶን ዛላ ማክቴ። አቤል ክትፊናክኑ አማንቶባሰኪ ካሞ ሀሽኑ ማክቴድፊዋ።

5 ሄኖክ ክቱ ባሳሰታ ካርኖይናማቶ ደን ሳማ ኦድቴናሰ አማንቶክዋ። ሀኡሰ ባሪን ኤጵና ቦርአ እነ ቤሰቶዌ። ደን ኦቶባሰኒን ሰናክ ደይ ሀኡሶን ግርሲናማቶ ዛላ ማክቴዋ።

6 አማንቶ ፎንቶኖን ሀኡሶን ግርሱክ እፋ ችሞቶና ዉዛ። ሀኡሰኪ ታኦሴፌ አሱ ሀኡሰ ፎባሶንናዋ ባሮን ሾልሴፌ አሱኒ ሜያክ ደይ ዋሱማ ሰንባሶን አማናክ ሾልሲፋዋ።

7 ሀሽኑ አፋክ ቢስቶኖይ ዉዛሲ ችዋክ ሀኦስ ኖህኒን ቴትኔሶን ኦድዋ ይና ካባሲክ ኖህ ሀኦሶን ድንክ ባሳ ኬርኪ ባሶትን ፋኦክ ሜርኬቢ ዎስቴናስ አማንቶክዋ። ኖህ አማንቶባሲክ ሀን ዳስ ቦርኣሲክ ማቫሱ ባርስታ ካቶናክ ዛግ። ኖህ አማንቶክ ቤስቴፋ ኦኮሶን ደይ ዋራሴ።

8 አብራሀም ኬሪሴ ሪስትባ ዛግሬ ኤጴቶና ድማስታ ሀማናክ ቴግቴፊና ካባሲክ አይ ሀሚድፊናማቶ አሩ ቤይፊናክኑ ሀማናክ አጃጃሚናስ አማንቶክዋ።

9 ይሳቅኒሲማቶናዋ ያቆብኒሲማቶና አብድኒ ዳስታክ እርባ ሰንነ ዱርካኒስ ዲናስ አማንቶክዋ።

10 ኤስ ባሮን ደይ ዛግናስ ዛጋ ካፕታባ ፋና ሀኦስ ኮፓኤና ባሮንናዋ ዎስቴና ኤስ ካታማሶንና ኦደት ፊር ሰንና ቦርአዋ።

11 ሳራ ደይ አብድ ባርክ እማ ሀኦስ አማናምቶ ሰንናማቶ አሪና ቦርአ እዉነ ፋሮንኑ ኔባሰ ኦትፋን ኮጵናክ ችምኖር ሰንፋናክኑ ናኔርቶናክ ሀግና ዳናስ አማንቶክዋ።

12 ኤስ ባሪ ቦርኣ ክት እሱኒማቶ ፋድቴፊ እሳ አብራሀምኒኪን ሳማኪ ባኩራሲማቶ አሪክራ ደይ ባርሲ ቴሻ ፋ ፋቴሲማቶ ፋድቶኖይ ዛላ ቤስቴዋ።

13 ኤስ ባሶ ዙቴሬ አማኖቤሲሴቴ ክትሴቴ። ሀኦስ ባሶክ አማናክ ቴያኒ ካማ ግርና ባሮን ኣነ ዳኖቶ። ሰኑንታኖ ዎክሶክ ብያትቴ ሞሴሴቴ። ሀን ዳስታክ እርባ ደይ ኦሳ ሰኖቤሲሶን አርሴቴ።

14 ኤካ ማክሴፊ አሱኒ ሜያ ባሶር ሰና ዳሶን ኦደት ፊሴቴማቶ አምማኖን ቤሲሴፊ።

15 ኤስ ቤየ ኬሴቴ ዳሶን ያዳቴሴቴ ሰንፋናነ ኤክ ዎል ሌ ሀማክ ችዋን ካባዋ።

16 ሰኑንታኖ ሀሽ ባሪስታን ደናሎ ሰና ሳማኪ ፋ ዳሶንቴ ካልቴሴፊዋ። ኤስ ባሪ ቦርኣ ሀኦስ ባሶክ ካታማ ሆሲና ቦርኣ «ሀኦኒ» ይሬ ቴግሴፋቴነ ባሮን ኣፋ ኢቹና ዉዛ።

17 አብራሀም ፋታንቴፊና ካባሲክ ይሳቅኒን ማእ ዛግሬ እምናስ አማንቶክዋ። ኤስ አብድኒ ካማሶን ኤጴቴ አብራሀም እሳ ናባስን ማእ ዛግሬ ሹካናክ ሆሬሬ ፊርዋ።

18 ኤሲሲክ ሀኦስ፡-

«ይሳቅኒ ዛላሲክቴ ቴግቶና» ይት ማኬራ ፋር።

19 ሀኦስ ክቴን ካብጉክ ችማር ሰንባሶን አብራሀም አማኖባሲክ ክቴን ካብናንነ ፋ ቤሶክ ይሳቅኒን ሄፕሳ ዳዎልግሬ ዳኒ።

20 ይሳቅ ሀንኔንቲ ሰንኒ ወዛሶን ሳፋርክ ያቆብንናዋ ሄሳወንና ሱስናስ አማንቶክዋ።

21 ያቆብ ክቱና ዋና ካርፋና ካባሲክ ዮሴፍኒ ናንጎታሲክቶናኒን እሳርባ እሳርባሲክ ሱስናሴዋ ሃርሲክ ግሜሬ ሳጋደናስ አማንቶክዋ።

22 ዮሴፍ ደይ ክቱና ዋና ካርፋና ካባሲክ እስራኤልኒ ሜያ ግብዱን ኬሶነማቶ ማኬናስ ደይ ሜጋባሲ ችዋኖን እዉ ዛግሶነማቶ አጃጅ እምናስ አማንቶክዋ።

23 ሙሴኒን ኮኒ ባሶ ኮንቴፊና ካባሲክ ጋዳ ና ሰንባሶን ብየቲ ቦርኣ ታቶሳ አጃጅኖን ድጎናይ ኬዝ አስሳ አቕሴቴስ አማንቶክዋ።

24 ሙሴ ድቕናኔን ኦርፎ፡- «ፌሬኦንኒ ናኒ ና» ይሰቴሬ ቲግቶሶን ቤይናስ አማንቶክዋ።

25 ኤስ ባሪ ቦርኣ ባር ቦርኣክ ቤስቴፋ ጋሮ ዋን ኒ ግራሰታን ሀኦሲ ዳራኔን እነ ሻና ኤጼቶሶን ኮሪ።

26 ሀንኔንቲ ዳናና ዋሱማሶን ቢና ቦርኣ ግጽጽኪ ኦትማሰታን ደናሎ ሙድቶሳ ቦርኣ ሳልጸቶስ አካማ ኦትማ ሰንባሶን ሳፋሬ።

27 ታቶሳ ግኡኖን ደይ ድጎናይ ግጽጽኒ ዳሶን ጋፍከሬ ኬስናስ አማንቶክዋ። አፋክ ቢሰቶኖይ ሀኦሶን ቢናንነ ፋሮን ዛግሬ ሳፋራባሲክ ዛግ።

28 ኡዛ ናንጎታሲክቶኖን ዋሩናክ አጃጃምቲ ሀኦሲ ዋሲያ እስራኤልኒ ሜኒ ኡዛ ናንጎታሲክቶኖን ዋሩኖይናማቶ ፋስካነዋ ሀርንኒ ዊርነ እሲ ቱማሶን ዛግናስ አማንቶክዋ።

29 እስራኤልኒ ሜያ እቕማ ዳሰታክ ፍነፌሰነ ፋሮን ሰንነ ሸኣ ባሪሶን ፍነሴቴስ አማንቶክዋ። ሰኑንታኖ ግጽጽኒ አሱኒ ሜያ ኤካ ዛጉክ ካቤሴፊን ዙታምቤሲሴ እሲን አካስ ኮርኦ።

30 እስራኤልኒ ሜያ እያሪኮኒ ኦጃሶን ናፋን ዋና ብራቴሴቴነን ኦርፎ ኦጃስ ቦግቴናስ አማንቶክዋ።

31 ጌርኬስፋ ራሀብ ኣፍፎኒ ሜያኖን ናጋክ ኤጳታና ቦርኣ አጃጃምኖይ ባሶኔን እነ ክቱሰን ፋእቴናስ አማንቶክዋ።

32 ኤስ ባርሰታን ኦማ እዉ ኡናሪንሶ? ጌደዎኒ ችዋሶን፤ ባራኪኒ ችዋሶን፤ ሳምሶንኒ ችዋሶን፤ ዮፍታሄኒ ችዋሶን፤ ዳዊትኒ ችዋሶን፤ ሳሙኤልኒ ችዋሶን፤ ደይ ራጂኒ ሜኒ ችዋሲ ቶቾኖን ማኮና እያናነ ዋና ኣፋ ሆሮና ዉዛ።

33 ባሶ አማንቶክ ታቶስኪቶኖን ሜርሴቴ። ፋቶክ ማጃሱ ካርኤቴ፤ እምቲ አብዲሶን ደይ ዳነቴ። ኤቶሳ ኖኖኖን ኩልፍሴቴ።

34 ጌያሲ ሁግናኖን ትሸክሴቲ፤ ካጋ ሲፎሰን አቴቲ፤ ሆፕቤሲሰን ዛግ ሰነቲ። ኔቦክ ችም ሰነቲ፤ ቤትሬ ትሸኩክ የ፤ ጉማሰን ካሌ ኮፋክሴቲ።

35 ማሽካሱሲክቶ ባሶ ኬን ሰነፋት ክት ባሶትን ክቱኒ ካብሴቲን ዳነሴቲ። ኦምኒ ሜያ ደይ ኤሰ ባርሰታን ደናሎ ሰና ክቱን ካቡሶን ዳናክ ብርማዲማ ኬሳሶን ቤይፋት ሾዎ ቲሳ ሻና ኤጴቴሴቲ።

36 አሚሰ ደይ ካሽሰቴሬ እቼሴቲ፤ አሚሰ ዎቾኒ ግኖክ ታቲሬ ታቶኒ ኬር ሀቴሴቲ።

37 ሹአክ እቼሴቲ፤ ማጋዘክ ካላሰቴሴቲ፤ ሲፎክ ዎርቴሴቲ፤ ፋንቱነዎ ፍዘነ አሲ ኮማ ማየሬ አካማኖን ሻና ኤጴቴሴሬ ካቡግቴር ሰነሬ ብራቴሴቲ።

38 ዛቦሲ፤ አማሰታ፤ ዳሰ ሰካሎሲ ፋ ዱጋዲግሲኔን ራታኤሴቲ። ሀን ዳሰ ባሶክ እነ ማሎዎ።

39 ኤሰ ባሶ ዙቴሬ አማንቶቤሲሲ ቦርአ ባሶክ ዛላ ማክቴር ሲንፋናክኑ እምቴ አብዲሶን እነ ዳኖቶ።

40 ሀኦስ እኖክ አካማ ማእ ዉዛ ኮፓኤ። ኤሰ ባሪ ቦርአ እኖኔን አነታኖ ባሶ ባሶ ቱም ሰኖነክ እነ ችሞሶቶ።

12

ሀኦስ ናንጎትባሶን ኬእር

1 ሻሩኒማቶ ብራቶኒሰታ ፋ ሾዎ ዛላሲክቶ ፋናኔን እኖሰታ ባአነማቶ ፋይያ ፋ ዉዛሶን ዙትራ ደይ እኖሰታ ታጽቴራ ፋ ቦርአሶን ትሸክራ ሰንኒሰታ ፋ ኣቶ ኣቶኒ ኤላሶን ፋክያክ ዛግራ ኤላኒ።

2 ኤላኒሰ ደይ እንኖ አማንቶሶን ካፑቴ ደይ ኮእባ ካቱኒር ሰና የሱሰኒን ቢራዎ። ባር ሰንባሰታኪ ፋ ግራሲክዎ እያት ሜሰቀልሰታኪ ክቱኒ ሳልጲናሶን እሳ ዉዛነ ዛግሬ ፋዲኖይ ሜሰቀልሰታኪ ሻናኒ ክቱሶን ፋኪ። ሀኦሲ ዝግግኒ ሆእታሰታ ደይ ድ።

3 ኤሴ ኦምቶኖይናዎ አብድ ቡጉኖይና ሀን ቦርኒ ሜኒ ቱጋኦሶን ፋኪ የሱሰኒን ቢት።

4 ንቶ ቦርአኔን እነ ካቦክ ሀርንኒ ዉኩታኔን ካርአ እነ ቱጋኦዌሴቲዎ።

5 ሀኦስ ናንጎትባሪማቶ ዛግራ ኤካ ይት ኪትና ኪቶሶን ዳጌትዎ።

«ናታሶ! ዳሚሳ ኬኦኖን ካሹታታዎ፤

ኔን ኬእፌና ካባሲክ አብድ ቡጉታታዎ፤

6 ዳሚሰ ሹንና ባሪን ኬእር፤

ናባ ዛግሬ ቢፌና ባሪን ደይ ሱሰር።»

7 ሀኦስ ናንጎትባሪማቶ ዛግራ ፋድፋና ቦርእ ኬኦሶን ፋኩት።
አባባሰ ኬኡኖይና ና ኣፌሪንሶ?

8 ናንጎታ ሰና ባርኪቶ ዙቴራ ኤጳ ታሴፋና ኬኦሶን ንቶ ደይ
ኤጳ ቶ ሻካትነ እም አባሲኪን ኮንቴርታኖ ኬርኪ ናንጎታታዎ።

9 ኤሰ ባርኔን ደናሎ እኖትን ኬኢ ኮኒ አባኒ ሜያ ፌሴቴር።
ባሶትን ደይ ኡልፍንሰቱ ፋፌኒ። ኤኪን ካክ ፎክ እያናሰቶኒ
አባሲሰን አካማናን እጃጃሞኒክ አካክ ሾልሱ ቤይንሪንሶ?!

10 ባሶክ ማእሪ ሰንና ቤሰቴናሰማቶ ጋሮ ዋናኖን እኖትን
ኬእሴሴቴ። ሰኑንታኖ ሀኦስ ባሪ ኮርቶሶን ሃኤር ሰናኒክ እኖክ
ኬኒ ወዛክቱ ኬእፋ።

11 ኬኦስ ዙቴራ ኤሰ ካባሲክ አሱ ሱሞናክቱ ዛግፋታኖ
ግሮናክ ዛጉኒር ሰንና ኣነ ቤሰቴፋ። ሰኑንታኖ ሌጅሰቴሬ አሪ
አሱኒ ሜያክ ናጋ ቱምና ኦኮ ሰናክ ቤሰቴፋ ጋናሶን ዳናክ
ዛግፋ።

ኪቶነዋ ኬኦነ

12 ኤሰ ባሪ ቦርእ ጎድባ ሻኪ ኩሹንትሶንናዋ ሆፒ ግዶሶንና
ዛጉቲ።

13 ኤጃታ ባር ፋሩናክታኖ ድምባሰታን ሻቴራ ሾርኮኖይናማቶ
ዎቾንትሲክ ዜጵቶ ኡግና ሆሱቲ።

14 ኮርቶ ፎክ ፎኖይ ኦኑ ዳሚሰን ብያክ አፋ ቾማናዉዛ ሰንና
ቦርእ አሰሱ ዙታምባሴኔን አነ ናጋክ ፎቲ። ኮርቶ ፎኒ ፎክ ደይ
ዱደሶቲ።

15 ንቶሰን ኦኑ ሀኦሲ ኦትማ ዮኡኖይናማቶ ቱትኒትሶን
ኦድቲዋ። ኤሲሰማቶ ደይ እሳ ሱቃሮኒ ታሳ ጋነንትሲ
ካዩኖይናማቶናዋ ራክሱኖይናማቶና ሾዋኒ ሜያኖን ደይ
ኪንሱኖይናማቶ ቱትንቶሶን ኦድቲዋ።

16 ዋቤታ ሰንና ወደይ እሳርጋ ሙና ሙሲክዋ እያት ኡዙን
ሰንባሶን ዋጌ ሃሳዉኒሲማቶ ዝናባ ፌና አሱ ፎኖይናማቶ
ቱትኒትሶን ኦድቲዋ።

17 ኦርፎ ደይ ሃሳዉ ሄፕሳ ኤባ ዳናክ ሾሌፌና ካባሲክ
ኤሰ ኤባሰ ካልቴናማቶ አርፌት። ዋሰትኑ ኤሰ ኤባሶን ጉዝሬ
ሾሌፌናክኑ ዳናክ ኣነ ቾሜ። ሀርምሬ ዋሉክኑ እሳ አጣ ኣነ
ዳነ።

18 ንቶ ኩሹክ ታእቲፋ ደይ ኪቼት ፋ ሲናኪ ኣማሰኪ *፤ ኤክ ክእናሰኪ፤ ደይ ኤክ ታልማሰኪ፤ ኤክ እፑዋሰኪ ኣነ ካርኤቲ፤

19 ኡሉሊኒ ካማ ወደይ ማክቲት ፋ ካማሰ ኦድቴፋናሰኪ ኣነ ካርኤት። ኤሰ ካማሶን ኦደ እሱኒ ሜያ፡- «ሀንኔን ኤካሎ ኦማ ካማ እኖክ ማክቶናታ» ይት ሺጽሴቴ።

20 «ዋጋ ኣማሶን ታእፋናነ

ሹእክ እቼራ ክቱን።»

ይፋ እጃጂሰ ፋይና ቦርእ ዋርእክ ኣነ ቛሞቶ።

21 ቢሰቴ ዉዛሰ እካማኖን ድግሱ ሰንና ቦርእ

ሙሴኡ፡- «ድጌን፤ ደይ ኮርኪን» ይ።

22 ሰኑንታኖ ንቶ ዲዮንኪ ኣማሰኪ ታእሴትዋ፤ ባር ደይ ሀየዋ ሀኦሲ ካታማ ሳማኪ የሩሳሌምዋ። ግራክ ዙቴሴ ሾዋ ኩማ ፋድቶኒ ሀኦኒ ዋሰያሲክቶኪ ታእሴትዋ።

23 ሱንቤሲሰ ሳማክ ትቼና፤ ኡዛኒ ሜኒ ማባራሰኪ፤ ዙታምባሴ አሲሰታ ማጃሱ ካርኒ ሀኦሰኪናዋ ቱም ሰናሶን ዳነ ኦኮኒ ሜኒ አያናሲክቶኪና ታእሴትዋ።

24 ጋድዶ ቴያኒ ካምኒ ጋነያ ሰና የሱሰኒኪ፤ አቤልኒ ሀንናሰታን ደናሎ ሰና ባሮን ማኬፋ ባርኪናዋ ዊርቲ ሀንናሰኪና ታእሴት።

25 ኤሰ ባሮን ማኬፋ ባሮን አፋ ኤጳቶኒ ዉዛ ኡኖይትማቶ አሩትዋ። ኤሰ ሀኦ እሱኒኪ ካሞ ዳሰታኪ ማኬፋና ካባሲክ አፋ ኦዶን ዉዛ ይሴ ባሶ አቲ ኬሳ ሻክሴቴንን ኤኪን አሩትዋ ይሰቴራ ሳማን ማክቲ ባሮን ኤጳ ቶ ሻካኒኒ ኣካክ አቲ ኬሳክ ቛማንሪንሶ?

26 ኤሰ ካባሲክ ካምባሰ ዳሶን ሾርኪ። ሰኑንታኖ ሀሽ «ዳሶን ኮእባ ሰኖይናሮን እሳርጋ ሄፕሳ ሳማሶን ጌዳ ሾርኩና» ይት ቴያ ግሪ።

27 ኤሰ፡- «እሳርጋ» ይፋ ካማሰ ቤሲፋናሰ ሾርኮኖይ ዉዛሲክቶ ዛግራ ፎናክ፤ ሾርኬፋ ባር ወደይ ቴሰቴ ዉዛሲክቶ ትሻክቶኒር ሰንባሶቻዋ።

28 ኤሴ እንኖ ሾርኮኖይ ታቶሶን ኤጳቶኒር ሰንና ቦርእ ሀኦሶን ጋላቶኒዋ። ባሪን ግርሱኒ ኡግናክ ኡልፍናክናዋ ድጋክና ባሪክ ዋሰቶኒዋ።

29 ፋቶሲክ ሀኦኒሰ ኪቹፋ ጌያሰዋ።

* 12:18 «ሲናን ኣማሲክ» ይፋ ባር ግሪክኒ ማፃፋሲ አፋ

13

ሀኦሶን ግርሲፋ ዋሰቶ

¹ ዋንና ዋንና ንቶትና ንቶትና አይና አይና አሲ ኬሸታንቲ ፎን።

² እርባኒን ኤጼ እርባሱሶን ዳጎትታ። ኤካ እርባኒ ሜያኖን ኤጼቴሴሬ እርባሲት ፊሴቴን እሳ እሳ ሜያ እሩኖይ ሀኦሲ ዋሲያኖን ኤጼ እርባሲሴቴ።

³ ባሶኔን እነ ታቴትነ ፋሮን ዛግራ ታቶኒ ሜያኖን ሳፋሮት። ንቶ ደይ ባሶሲማቶ ሻና ኤጼቴርነ ፊር ሰንና ሻና ኤጼቴሴፊ ባሶትን ሳፋሮት።

⁴ ኤጽነ ግሩነ ዙታምባሴ አሲክ ኡልፍንቶ ሰኑን። ዋቤታ ሰነፊ ባሶሰታናዋ ጌርኬሴፊ ባሶሰታና ሀኦሰ ማቫሱ ካርኒር ሰንና ቦርኣ አባነ እንቶነ አማንቶ ዮእግሴሬ ኤጽነ ግሩነ አሲን ኪንሱሶኔታ።

⁵ ዋግኒ ኬሸታናሰታን ዋክት፤ ንቶክ ፋዪሰ ሆሮና፤ ሀኦሰ፡ «አፋ ሀኡና ወዛ፤ ደይ እሳንነ አፋ ቤያና ወዛ» ይዋ።

⁶ ኤሰ ባሪ ቦርኣ አማንቶክ፤

«ዳሚሰ ታን አሪጋሱናዋ፤

አፋ ድጎና ወዛ፤

እሱ ታን አዉ ዛጉክ ችምኒርን?» ይፊን።

⁷ ሀኦሲ ካማኖን ዜምሜ ንቶክ ማኬ ዘንሰንትሳክቶኒን ዳጎትታ፤ ባሶ ፎሶንናዋ ዋሰቶቤሲሰ ጋናኖንና ሳፋሮክ አማንቶቤሲሲክ ዘኩሰቶሶት።

⁸ የሱሰ ክርሰቶሰ ሀዘ ሰኑን ሀውቶ ደይ ኮእባኔን ካርኤ ባርኑርዋ።

⁹ ኦራ ኦራ ቴሳ አሱክ ኦቴራ ሀማትታ። ንብኒሰ ሙኒ ሰትሪሶን ኦዳክ ሰኖይናማቶ ሀኦሲ ኦትማክ ሰንፋንነ ማእርዋ። ኤሰ ሙኒ ሰትሪሲክ ዘኩሰቴ አሱኒ ሜያክ ኣነ ኬአ።

¹⁰ እንኖ እምፊኒ ሾአ ፋር። ሰኑንታኖ ዱርካኒሲ ዋሰቴሴፊ ማግኒ ሜያ ኤሰ ማእ እምቴፋና ሾኣሰታ ፋ ሙሶን ኤጼ ሙ ኣነ ፋቃድቶዋ።

¹¹ አይሁድኒ ሜኒ ማግኒ ጋኝኜ ሜኒ ጋኝኛሰ ቦርኒ ፋኪኒ ዳና እምፋ ዋግኒ ሀንናሶን ኤጼ ኮርቶሲ ኮርቶሲ ግሪፊ። ሰኑንታኖ ክት ዋጋሲ አሻ ኬኤሰን ጌር ኬሰሳ ኪቼፋ።

¹² ኤሲሲማቶ የሱሰ ዳራሰን ባሳ ቴትኒ ሀንናሲክ ኮርቶ ዛጉናክ ካታማሲ ፍኛኔን ጌራካሎ ሻና ኤጼቴ።

13 ኤሴ እንኖ ደይ ኬኤሲን ኬሰሳ ባርኪ ሀማኒ። ባር ኤጼቴና ሳልጲናሶን ደይ ሃኤር ሲናኒ።

14 እንኖ ሀንኔንት ዮኒ ካታማሶንቱ ኦድትፊኒታኖ ሀን ዳሰታክ ዛግራ ፎኒ ካታማኒ አፋዋ።

15 ኤሴ የሱሰ ክርስቶስኒኪ ካሞ ጋላትኒ ማኣሶን ዬቱኖይ ሀኦሲክ እማኒ። ኤሴስ ደይ ሱንባሲክ ዛላ ማኬፋ ኖኖሰኪን እምቶኒ ጋላትኒ ጋናሰዋ።

16 ማእ ወዛ ዛጉሶንናዋ ንቶክ ፋዪሶን አሚሲክ ሃኦሶንና ዳጎትታ። ሀኦሶን ግርሲፋሰ ኤሰ ኤፋቴና ማኣሰዋ።

17 ንቶ ዘንሲሳክቶኒክ አጀጃሞት። ባሶ ሀአሱሲ ሰካሎሲ ሰኖት። ባሶ ንቶ ካሲ ችዋክ ማሙሰቶሶን ወዛ ፋር ሰንና ቦርእ ጉዘሬቱ የርሴፊ። ንቶ ባሶክ አጀጃሚፋትን ዎስቶቤሲሶን ግራክ ዎስቶሶን። ኤሰ ባር ሰንና ሻካናን ዎስቶቤሲሶን ሱሞክቱ ዎስቶሶን። ኤሰ ባር ደይ ንቶትን ሚርኤር።

18 እኖክ ሺጶት፤ ካይማ ካኑኒ ፋር ሰንናማቶ ፋቶክ አሪራቱ ፋኒ። አፋ ኡግናክቲ ሰኑን ማእ አማላክ ፎኒክቱ ሳፋሬፊ።

19 አካማኖን ጉዘራ ሺጶትክ ዛግራ ማምሲፋናሰ ታፕታክ ንቶኪ ዎል ላ ዮናክዋ።

ኮእኣሰታኪ ኤባ

20 ፋንቱሲክቶኒ ኬሚር ሰና አርኪ ዳምኒ የሱሰኒን ኮእባ ፎንቶ ቱያኒ ካምኒ ሀንናክ ክቱን ካብግ ናጋኒ ሀኦሲ፤

21 ፍቃድባሶን ኮእሱክ ችማትክ ማእ ወዛ ዙታምባሴ አሲክ ንቶትን ቱም ዛጋወጃዋ። ባሮን ግርሱኒ ወዛሶን ደይ የሱሰ ክርስቶስኒኪ ካሞ እንኖሰሲ ዛጉን። የሱሰ ክርስቶስኒክ ኮእባ ፎንቶኖን ኡልፍና ሰኑን! አሚን!

ኮርኤባ

22 አይኒ ሜያነ! ሀን ንቶክ ካወናኖን ትችና ሀን ኪቶኒ ዎሲያሶን ፋኪያክ ኤጶቶትክ ዛግራ ሺጶፋወጃዋ።

23 አይኒ ትሞትዮሰ ታቶኒ ኬሩን ኬሰንናማቶ አሩትክ ሾሌፋኡችዋ። ታእኖን ሀኒ ዬፋናን ባርኔን አነ ያራ ንቶትን ብያናዋ።

24 ንቶትን ዘንሰፊ ባሶክናዋ ሀኑኒ አሱኒ ሜያክና ዙትራ ናጋ ማኮት። ጣልያኑን ሰና ባሶ ናጋ ንቶክ ኦሽሴድቱ።

25 ሀኦሲ ኦትማ ንቶኔን አነ ሰንፋውጃዋ! አሚን!



**The New Testament in the Yemsa language of
Ethiopia, Ethiopic script**

copyright © 2025 The Word for the World International

Language: (Yemsa)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-06

PDF generated using Haiola and XeLaTeX on 5 May 2025 from source files dated 6 May 2025

03dcb1ff-0ef6-5f0e-a777-31ea8d578ea7